

Na osnovu člana 64. stav 5. Zakona o vodama („Službene novine Federacije BiH“, broj 70/06), federalni ministar poljoprivrede, vodoprivrede i šumarstva d o n o s i

**PRAVILNIK
O DOPUNI PRAVILNIKA O USLOVIMA KOJE MORAJU ISPUNJAVATI
REFERENTNE ODNOSNO OVLAŠTENE LABORATORIJE ZA ISPITIVANJE
VODA, SADRŽAJ I NAČIN DAVANJA OVLAŠTI**

Član 1.

U Pravilniku o uslovima koje moraju ispunjavati referentne, odnosno ovlaštene laboratorije za ispitivanje voda, sadržaju i načinu davanja ovlasti („Službene novine Federacije BiH“, br. 14/10., 14/13., 26/14 i 15/17), u članu 39. iza stava (1) dodaje se novi stav (2) koji glasi:

„(2) Rok za pribavljanje akreditacije iz člana 4. stav (2) ovog Pravilnika utvrđen rješenjima o davanju ovlaštenja laboratorijama za ispitivanje voda izdatim do dana stupanja na snagu ovog Pravilnika se produžava do 01.03.2018. godine za parametre ispitivanja otpadnih voda iz člana 37. stav 2. Pravilnika, a za sve ostale parametre ispitivanja voda do 01.03. 2020. godine.

Član 2.

Ovaj Pravilnik stupa na snagu narednog dana od dana objavljivanja u „Službenim novinama Federacije BiH“.

Broj: 07-25-1/2- 616-1 /17
20. marta 2017. godine
Sarajevo

MINISTAR
mr.sci. Šemsudin Dedić

OBRAZLOŽENJE
PRAVILNIKA O DOPUNI PRAVILNIKA O USLOVIMA KOJE MORAJU
ISPUNJAVATI REFERENTNE ODNOSNO OVLAŠTENE LABORATORIJE ZA
ISPITIVANJE VODA, SADRŽAJ I NAČIN DAVANJA OVLAŠTI

1. PRAVNI OSNOV

Pravni osnov za donošenje Pravilnika o dopuni Pravilnika o uslovima koje moraju ispunjavati referentne odnosno ovlaštene laboratorije za ispitivanja voda, sadržaju i načinu davanja ovlaštenja (u daljem tekstu: Pravilnik) sadržan je u članu 64. stav 5. Zakona o vodama (Službene novine Federacije BiH", broj 70/06) prema kojem je federalni ministar poljoprivrede, vodoprivrede i šumarstva ovlašten da utvrdi uslove koje moraju ispunjavati referentne odnosno ovlaštene laboratorije za ispitivanje voda, sadržaj i način davanja ovlaštenja.

2. RAZLOZI ZA DONOŠENJE PRAVILNIKA

U Federaciji BiH četrnaest laboratorija je ovlašteno od strane Ministarstva poljoprivrede, vodoprivrede i šumarstva za ispitivanje voda, sa rokom do 22.3.2017.godine za pribavljanje akreditacije po BAS ISO 17025 standardu za sve analitičke poslove koje obavljaju.

Većina ovlaštenih laboratorija je započela proces akreditacije, ali obzirom da je to zahtjevan i dugotrajan proces koji zahtijeva velika finansijska ulaganja, te odgovarajuća stručna znanja, još nijedna ovlaštena laboratorija nije pribavila akreditaciju za sve parametre i metode ispitivanja voda.

Nakon provedene analize i istraživanja, FMPVŠ je zaključilo da se očekuje da će se većina laboratorija u roku od narednih godinu dana akreditovati po BAS ISO 17025 standardu za petnaest (15) osnovnih parametara ispitivanja otpadnih voda navedenih u članu 37. stav 2. postojećeg Pravilnika, koji su propisani odredbom člana 11. stav 6. Uredbe o uslovima ispuštanja otpadnih voda u okoliš i sistem javne kanalizacije („Službene novine Federacije BiH“, br. 101/15 i1/16), dok se pribavljanje akreditacija za sve ostale parametre ispitivanja voda očekuje u periodu od naredne tri godine.

Shodno naprijed navedenom, donošenjem dopune ovog Pravilnika uskladit će se vremenski rok za pribavljanje akreditacije utvrđen u postojećim rješenjima izdatim ovlaštenim laboratorijama, kako za osnovne parametre ispitivanja otpadnih voda tako i za sve ostale parametre ispitivanja voda, sa rokom propisanim odredbom člana 37. stav (1) i (2) važećeg Pravilnika.

3. OBRAZLOŽENJE POJEDINIH ODREDBI

Članom 1. predloženog Pravilnika o dopuni Pravilnika o uslovima koje moraju ispunjavati referentne, odnosno ovlaštene laboratorije za ispitivanje voda, sadržaju i načinu davanja ovlasti predloženo je produženje roka za pribavljanje akreditacije utvrđenog rješenjima o davanju ovlaštenja laboratorijama za ispitivanje voda izdatim do dana stupanja na snagu ovog Pravilnika, radi usklađivanja sa odredbama člana 37. stav (1) i (2) Pravilnika o uslovima koje moraju ispunjavati referentne, odnosno ovlaštene laboratorije za ispitivanje voda, sadržaju i načinu davanja ovlasti.

4. PROCES JAVNIH KONSULTACIJA

Obzirom da predložena odredba Pravilnika ne sadrži suštinsku promjenu, nego se samo usklađuje vremenski rok za pribavljanje akreditacije, nema potrebe za provođenjem javnih konsultacija.

5. PROCJENA EKONOMSKE OPRAVDANOSTI DONOŠENJA PROPISA, OBRAZLOŽENJE FINANSIJSKIH SREDSTAVA ZA PROVOĐENJE PROPISA I FINANSIJSKE EFEKTE

Za realizaciju ovog Pravilnika nije potrebno izdvajanje finansijskih sredstava iz Budžeta Federacije BiH. U prilogu je dat i odgovarajući obrazac u skladu sa odredbama Pravilnika o proceduri za izradu Izjave o fiskalnoj procjeni zakona, drugih propisa i akata planiranja na budžet.

6. OCJENA USKLAĐENOSTI SA EU ZAKONODAVSTVOM

Obzirom da se ovim Pravilnikom samo usklađuje vremenski rok za pribavljanje akreditacije, nema potrebe za izradu Usporednog prikaza i Izjave o usklađenosti.